

SCARPI RUOSSI

I passi i manu 'mpicciusi ri terra
ri cielu
acqua e bbientu ri ijèlu stisu ri ciana
l'ientu
sutt' ô tascu l'uocci russi
ncuttu u sciātu

affrittu u cori picciuttiedhu

passu passu ... appriessu âratu
i rinoccia scippànnicci rê surca e i jorna
i pugna a ssiminari
e ar'ogni ttorna...abbucatu
cciù ll'ientu
i cuccidha spiarsi vuòrrica cchê ita
siennu a morti semenza ri vita...e-ppuoi rricuminzari.

A sira ê cuticci
scarpî ruossi
ri terra cci pìttunu i facciuzzi
turnannu agghiri ê casi...ntâ trazzera.
Cciù llonca n'ùmm'ra scila cciù avanti:
"Ansignimi, pathri, pirchi... a simenza rê sciuri
ca nasci... crisci... a-ll'annu ddhicari e si ni mori...
... e ll'acqua ca ciuvi
ri vithru ccô ijelu thraspari
e ri aria si n'abbola a li cela ...e u sulì
ca ora si curca ntô mari
rê munti si susi ô gghiurnari... e a luna
piatusa... ri notti llusthra luntanu
ni talia, senza caluri macari... "

"Fuorsi, figghiu, bbiniritta ddhà Manu simìna
acqua e bbientu rô cielu ca cula
supr'â terra c'assuppa
a luna voli ca cianci e u sulì c'arriri
e ar'ogni gn' juornu pruvìri
ca a natura cchê figghi s'aterna e cchê sciuri.
Cù sapi u ristinu.
Ma tu ora... sùsiti ! e cerca ntê libbra a simenza rê rrica
ca ntâ stasciuni gghiusta c'agghica
u cirviedhu cciù ffinu rricogghi -rê scarpî ruossi -a fatica."